

**ጳውሎስ  
ኤፌሶን አሳስ  
ፃፊ ዜጋ  
ጊዶ ቆፋ**

ጳውሎስ ኤፌሶን አሳስ ፃፊ ዜጋ ሃራፔካ ካሴቲዲ ኢዚሎሜሳ ሂሊዳይ “የሳ ሽኔይ ፖሌታናይ ሳሎንኔ ሳፃን ዲዛ ሜዴቴላቲ ወሪካ ኢሲፌ ኢሲ ኪርስቶሳ ጎዳቴላ ጋርስ አዲዛ ዎዴይ ጋኪሺና” (1:10) ጊዛ ቆፋ ቦላ። ቃሴካ ጎዳ ዮሱስ ኪርስቶሳ ኢሲፌቴላን አሳ ዜሬሲ ወሪካ ኢሲኖ ጊዳና ማላ ሃይሳ ጊታ ቆፋ አሶን ፔይሻና ማላ ያሳ ዴሬዛ ቆፐሲዛዛ።

ኤፌሶን ኪታን ኮይሮ ኪፊሌዛ ፃፊዚ ኢሲፌቴላ ጊሽ ዶሚዲ አይፌ ዮዎዛ አሲዲ ያሳ አዋይ ዴሬዛ ዎስቲ ዶሪዳኮ፣ ባ ናዛ ዮሱስ ኪርስቶሳ ባጋራ ኢስቲ ባ ናጋራፔ ማሮቴሳ ዴሚዲ ዋኒ አቲዳኮኔ ያሳ ጊታ ሂዶታ ቃላይ ሂሎ አያና ባጋራ ዋኒ ቆንጨዳኮ ኤሪሴስ። ናምዓንታ ኪፊሌዛን ቃሴ ፃፊዚ ናባቢዛይቲ ኢሲፌቴላ ዴዎን ኪርስቶሳን ኢስታስ ዲዛ ኢሲፌቴላይ ቱሙ ጊዳና ማላ ኢስቲ ዋኒ ዋኒ ዴዓናኮኔ ኢስታ ቆፐሲስ።

አሳይ ኪርስቶሳን ዲዛ ኢሲፌቴላን አይ ማላ ኢሲፌቴላ ኢስታስ ዲዛኮኔ ዱማ ዱማ ሃሳያ ቆሞታን ቆንጨዴስ። ዎሳ ኬሲ ኪርስቶሳ አሳቴሳ ጊዲሺን ኪርስቶሲ ቃስ አሳቴሳስ ሁዔ ማላ። ዎሳ ኬሳያ ጊምቤ ኬሳ ማላ ጊዲሺን ኪርስቶሲ ቃስ ኬሳስ ዴንቆሼን ኡቲዛ ሹቻ ማላ። ዎሳ ኬሲያ ማቺ ማላ ጊዲሺን ኪርስቶሲ ቃስ አዚና ማላ። ፃፊዚ ኪርስቶሳ ባጋራ ቆንጨዳ ያሳ ኪያቴላ ኬሂ ዶቂሲ ዮቲዛ ዎዴ ጨማቴሲ ዲዛ ቃላን ዮቴስ። ኡባ ሚሼካ ኢዚ ሂሊዳይ ኪርስቶሳ ሲቆን፣ ኢዛ ያርሼቴላን፣ ኢዛ ማሮቴላን፣ ኢዛ ኪያቴላንኔ ኢዛ ሳሮቴላ ባጋራኮ!

- ሃ ማፃፋይ አይኪዳ ኩሜላ ቆፋ
- ጌሎሶ 1:1-2
- ኪርስቶሳኔ ዎሳ ኬሴ 1:3-3:21
- ኪርስቶሳን ጊዲዳ አራሳ ዴዎ 4:1-6:20
- ኩሻ ቆፋ 6:1-24

<sup>1</sup> ያሳ ሽኔ ማላ ዮሱስ ኪርስቶሳ ሃዋሬ ጊዲዳ ጳውሎሳፔ። ዮሱስ ኪርስቶሳን ዲዛ አማኔቲዛይታስ ኤፌሶን አማኒዛ አሳስ። \* <sup>2</sup> ኑ

\* 1:1 ሃዋ 18:19-21

አዋ ያሳፈረኝ ጎዳ ዩሱስ ኪርስቶስን ኪያቴሌኒ ሳሮቴሲ ኢንቴስ ጊዶ።

**ኪርስቶስን ቤተዛ አያና አንጀ**

3 ኑ ጎዳ ዩሱስ ኪርስቶስ ባጋራ ሳሎን አያና አንጀ ኡባን ኑና አንጂዳ ጎዳ ዩሱስ ኪርስቶስ አዋይ ያሲ አንጂቶ። 4 ኑ ኢዛ ሲንሳን ጌሺኔ ዎሶይ ባይንዳይታ ጊዳና ማላ ቡሮ አላሜይ ሜዴታናፕ ካሴ ባ ሲቆን ኪርስቶስ ባጋራ ኑና ዶሪዴስ። 5 ዩሱስ ኪርስቶስ ባጋራ ኑ ኢዛ ና ጊዳና ማላ ባ ሎዎ ቆፋን ኮይሮ ወርሲ ዎሲዴስ። 6 ሄሲካ ባ ዶሲዛዴ ባጋራ ጮ ሜላ ኑስ ኢሜቲዳ ቦንቾ ኪያቴሳይ ጋላቴታና ማላ።

7 ያሳ አዶ ኪያቴሳ ዱሬቴሳፌ ዴንዶይሳን ዩሱሳ ሱሳን ዎዜቲዲ ናጋራፕ ኑ ማሬቲዶስ። \* 8 ኢዚ ባ ኪያቴሳ፣ ሂላቴሳኒኔ ኤራቴስ ኡባን ኑ ቦላ ኬሂ ዳርሲዴስ። 9 ያሲ ቆፕዳ ፁራ ባ ቆፋ ኪርስቶስ ባጋራ ባ ሎዎ ቆፋ ማላ ኑና ኤሪሲዴስ። 10 ቡሮፕ ዎዴ ወርሴሳን ሃናናስ ዲዛ ኢዛ ቆፋይ ሳሎ ቦላኔ ቢታ ቦላ ዲዛይታስ ኡባስ ሁጫ ጊዲዳ ዩሱስ ኪርስቶስን ወርሲ ጋርስ አሳና። 11 ወርሲካ ባ ሼኔ ማላ ኦሲዛ ኢዛ ሼኔን ኮይሮካ ኢዚ ቆፕ ዎሲዳይቲ ኑኒ ኢዛን ዶራቲዶስ። 12 ኑኒ ካሴቲዲ ኪርስቶስ ባጋራ ኤካና ጊዲ ኡፋይሳን ናጊዛይቲ ያሳ ቦንቾ ጋላታን ቆንጨሳናሳ።

13 ኢንቴካ ቃሴ ቴማ ቃላ ሄሲካ ኢንቴና አሺዛ ሚሺራቾ ቃላ ሲይዲ ኪርስቶስን አማኒዴታ። ኢዛ አማኒዲ ካሴ ኢሜታና ጌቴቲዳ ጊሎ አያና ማታሜን አታሜቲዴታ። 14 ሄ አያናዚካ ኢዛ ቦንቾ ጋላታን ቆንጨሳና ማላ ያሲ ኤራይስ ጊዲዳይታ ኡባታ ዎዛና ጋካናስ ኑ ላታስ አይሶ።

**ጋላታኔ ዎሳ**

15-16 ሄሳ ጊሽ ኢንቴ ጎዳ ዩሱሳ አማኒዳ ጊሺኔ አማኒዛ አሳ ኢንቴ ሲቁዛይሳ ታ ሲዮሳፕ ሃ ሲሚን ኢንቴና ቆፓ ቆፓ ኤካዳ ታኒ ታ ዎሳን ኢንቴ ጊሽ ያሳስ ጋላታ ሺሾ አጋቤይኬ። 17 ቦንቾ አዋ ጊዲዳ ኑ ጎዳ ዩሱስ ኪርስቶስ አዋ ያሳ ኢንቴ ሎጫሲ ኤራና ማላ ቆንጨሲዛ አያናይኔ ኤራቴሳ አያናይ ኢንቴስ ኢሜታና ማላ ታ ኢንቴስ ፓጩይ ባይንዳ ዎሳይስ። 18 ሄሳሶካ ኢንቴ ኢዛን ጄይጌቲዳ ኡፋይሳይ ሄሲካ አማኒዛይታ አቻን ዲዛ ኢዛ ዱሬቴሳይ አዛኮኔ ኢንቴ ኤራና ማላ ኢንቴ ዎዝና አይፌይ ፖዓና ማላ ዎሳይስ።

19-20 ኑስ አማኒዛይታስ ኡባፌ ቦላ ጊዲዳ ኢዛ ዎልቃ ዶቃቴስ ኢንቴ ኤራና ማላ ታ ዎሳይስ። ሄ ዎልቃይካ ኢዛ ጊታቴሳ ሚኖቴሳ ኦሶን ቤሲዳይሲ ሃይቆፕ ኪርስቶስ ዴንሲዲ ሳሎን

\* 1:7 ቆላ 1:14

ባ ኡሻቻን ኡቲሲዳ ኪርስቶሳ ባጋራ። \* 21 አይሲዛይታፕ፥ ጎዳቴላፕ፥ ዎልቃፌኔ ካዎቴሳፌ ቃሴካ ሃዲ ፃላ ጊዶንታ ቡሮፕ ያና ዎዴካ ጊዲን ሱንሳ ኡባፌ ኢዚ ቦላ። 22 ዎሲ ሃራ ዉርሲ ኢዛ ቶሆፕ ጋርሳን ሃሪሲዴስ። ዎሳ ኬሳንካ ኡባ ቦላ ሁዔ አሲዴስ። \* 23 ዎሳ ኬሲያ ኪርስቶሳ አሳቴላ። ሄ ኢዛካ ኡባሶን ኡባ ሚሽ ኩንሲዛ ሄ ኢዛ ኩሜላ።

## 2

### ኪርስቶሲ ፓዒ ዴንዲዴስ

1 ኢንቴ ኢንቴ ቆሂዳ ቆሆ ጊሺኔ ኢንቴ ናጋራ ጋሶን ሃይቂዴይታ ሺን፥ 2 ሄሳ ኢንቴ ሃይሳ አላሜዛ ኢታ ኦጌ ካሊዴታ። ቦላ ጫርኮ ቦላ ዲዛ ዎልቃማ ሃሪዛይሳስ ሃዲካ ዎሳስ አዛዜቶንታ አሳ ቦላ አሲዛ ኢታ አያናስ ኢንቴ አዛዜቲሼ ጋምዒዴታ። 3 ሃይሳፌ ካሴ ኑኒ ኑ አሾ አሞቴስ ፖሊሼ አሾይ ኮዬዛ ኦጌ ካሊሼ ኢስታራ ዶስ። ኑኒካ ሃንኮ አሳ ማላ ኑ ሜዴቴሳፌ ዎሳ ሃንቆ ጊዶን ዴዎስ።

4-5 ጊዶ አቲን ዎሲ ኬሂ ሲቂዳ ጊሽ ባ ማሮቴሳ ዳሮን ኑኒ ኑ ቆሆ ዳሬቴሳን ሃይቂዳይታ ጊዲ ዲሺን ኪርስቶሳ ባጋራ ኑና አሺዴስ። ኢንቴ ፓዒዳይ ኢዛ ኪያቴሳና። 6 ዎሲ ኑና ኪርስቶሳራ ጋሲ ዴንሲዴስ። ዩሱስ ኪርስቶሳ ባጋራ ኑና ሳሎን ባናራ ኡቲሲዴስ። 7 ሄሲካ ሃይሳፌ ጉዬ ያና ዎዴዛን ዩሱስ ኪርስቶሲ ኑስ ባ ኪያቴሳን ቆንጨሲዳ ዛዎይ ባይንዳ ባ ኪያቴሳ ዱሬቴሳ ኑና ቤሳናሳ። 8 ኢንቴ ዎሳ ኪያቴሳን አማኖን አቲዴታ። ሄሲካ ዎሲ ኢንቴስ ሜላ ጮ ኢሚዳዛፕ አቲን ኢንቴ አሶፕ ጊዴና። 9 አኒካ ጨቁቶንታ ማላ አሶፕ ጊዴና። 10 ሄሲካ ዎሲ ካሴ ኮይሮ ጊጊሲ ዎሲዳ ሎዎ አሶ ኑኒ አሳና ማላ ዩሱስ ኪርስቶሳ ባጋራ ኑኒ ናምዓንሳ ሜዴቲዳይታኔ ዎሳ ሜዴቴሳታ።

### ኪርስቶሳን ቤቲዳ ኢሲፌቴሳ

11 ሄሳ ጊሽ ኢንቴ ካሴ ኢንቴ ዩሌቴሳን አይዛቤቲ ኢንቴ አሳቴላ ቦላ አሳ ኩሼ አሶ ጊዶን “ኑኒ ቃፃሬቲዶስ” ጊዛ አሳቲ ኢንቴና “ቃፃሬቶንታይታ” ጊዛይቶ! ኢንቴ ሄሳ አኔ ዎዝናን ዎሲቴ። 12 ኢንቴ ሄ ዎዴ ኪርስቶሳፕ ሻኬቲዲ፥ ኢስራዔሌ ናይታፕ ሃኪዲ፥ ጫቆ ቃላሲካ አላጋ ጊዲዲ፥ ሃይሳ አላሜዛ ቦላ ሂዶታይኔ ዎሲ ባይንዳ ኢንቴ ካሴ ዲዛይሳ ዩሺ ቆፒቴ። 13 ሃዲ ቃሴ ኢንቴ ካሴ ሃሆን ዲዛይቲ ዩሱስ ኪርስቶሳን ጊዲዲ ኢዛ ሱሳ ባጋራ ሺቂዴታ።

\* 1:19-20 ማዛ 110:1 \* 1:22 ማዛ 8:6

14 ናምዓታ ኢሲ ቦላ ጋሲዲ ጊዶን ሻኪ አሺዛ ሚሻ ላሊዳ ኑ ሳርይ ኢዛ። 15 ዎጋ፥ ዎጋ አዛዞራ ጋሲ ኢሲፌ ባ አሾን ሻሪዴስ። ሄሳ ኢዚ አሲዳ ጋሶይ ኢዛስ ዋና ቆፋይ ናምዓታፔ ኢሲ አራሳ አስ ባ ባጋራ ሜዲዲ ሳርቴስ ኤሃናሳ። 16 ኢዚ ማስቃሌ ቦላ ሃይቂዲ ሞርኬቴስ ዲጊዴስ። ናምዓታካ ኢሲ አሾ ሂስቲዲ ያሳራ ማቃዩንሲዴስ። \* 17 ኢዚ ዩዲ ኢንቴና ሃኪ ዲዛይታሲኔ ማታን ዲዛይታስ ጋሲ ሳርቴስ ሳባኪዴስ። \* 18 ኑ ዉሪካ ኢዛ ባጋራ ኢሲ አያናን አዋ አቸ ሺቃና።

19 ሄሳ ጊሽ ኢንቴ አማኒዛይታራ ኢሲፌ ኢሲ ዴሬ አሳኔ ያሳስ ሶ አሳ አቲን ሃይሳሬ ጉዩ ቤቴታኔ ኢማሳታ ጊዴኬታ። 20 ኢንቴ ሃዋሬታኔ ናቤታ ባሳን ኬዌቲዴታ፤ ኬሳስ ዉርሴሳ ኩሻይ ዩሱስ ኪርስቶሳ። 21 ኬሳዚ ዉሪካ ኢሲፌ አይኬቲዲ ጎዳስ ዱማ ኬሴ ጊዳናስ ዲጩስ። 22 ኢንቴንካ ያሲ ባ አያናን ዳናስ ኢዛስ ዱሳሶ ጊዳና ማላ ኢሲፌ ኬዌቲሼ ዴታ።

### 3

#### አይዛቤታስ ሃዋሬ ጊዲዳ ጳውሎሳ

1 ሄሳ ጊዶን ታ ጳውሎሲ ኢንቴስ አማኖንታይታ ጊሽ ዩሱስ ኪርስቶሲ ቃቺዳዴ ጊዳዲስ። 2 ታ ኢንቴና ጎዳና ማላ ያሲ ኪያቴሳን ታስ አሶስ ኤፃ ኢሚዳይሳ ኢንቴ ቴማፔ ሲዩዴታ። 3 ሃይሳሬ ካሴ ታ ኢንቴስ ቃንሳራ ፃፊዳ ማላ ታስ ቆንጩን ታ ኤራናስ ዳንዳዩዳ ፀራይ ሃይሳ። 4 ሄሳ ጊሽ ኢንቴ ሄሳ ናባቢሼ ኪርስቶሳ ፀራ ታ አይ ማላ ኤሪዳኮኔ ኢንቴካ ኤራናስ ዳንዳዩታ። 5 ሄ ፀራይካ ሃዲ አማኒዛ ሃዋሬታሲኔ ናቤታስ ቆንጩዳ ማላ ካሴ ቤኔ አዲዳ ዎዴ ዲዛ አሳታስካ ቆንጩቤና። 6 ሄሲ ሄ ፀራይ አይዛቤቲ ሚሺራቾ ቃላ ባጋራ ኢስራዌሌ ናይታራ ኢሲፌ ላቲዛይታ፤ ኢሲፌ ኢሳዴ አሳቴስ ማላ ጊዲዲ ዩሱስ ኪርስቶሳ ባጋራ ቤቲዳ ሂዶታ ኢሲፌ ጊሼቲ ላቲዛይታ ጊዳናሳ።

7 ታካ ኢዛ ዎልቃ አሶ ማላ ታስ ኢሜቲዳ ያሳ ኪያቴሳ ኢሞታ ማላ ሃይሳ ሚሺራቾ ቃላ አሳንቻ ጊዳዲስ። 8 ታ ቃስ ሃንኮ አማኒዛ አሳፔ ላፋ ጊዲኮካ አኒካ ዛዋይ ባይንዳ ኪርስቶሳ ዱራቴስ አይዛቤታስ ሳባካና ማላ ያሳ ኪያቴሳን ሃይሲ ታስ ኢሜቲዴስ። 9 ሄሳሶካ ዉርሲካ ሜዲዳ ያሳን ቤኔ ዎዴ ቆቴቲ ዲዛ ያሳስ ፀራ ቆፋይ አዛኮኔ ኡባስ ታ ቆንጩሳና ማላ ታስ ያሳ ኪያቴሴ ኢሜቲዴስ። 10 ኢዛ ቆፋይ ሃዲ ዎዴ ዎሳ ኬሳ ባጋራ ዱማ ዱማ ሚዳይ ዲዛ ያሳ ሂላቴሴ ሳሎን ዲዛ ሃላቃታሲኔ ጎዳታስ ኤሬታና ማላ ሃኒዴስ።

\* 2:16 ቆላ 1:20 \* 2:17 ኢሳ 57:19

11 ያሲ ኑ ጎዳ ዮሱስ ኪርስቶስ ባጋራ ሃይሳ ፖሊዳይ ሜርና ባ ቆፋ ማላ። 12 ኑኒ ኢዛይታ ጊዲዳ ጊሺኔ ኢዛን አማኒዳ ጊሽ ጌሻቴሳራኔ ሂርጋይ ባይንዳ ኑኒ ያሳኮ ሺቃና ዳንዳዮስ። 13 ሄሳ ጊሽ ኢንቴ ቦንቴታና ማላ ታኒ ኢንቴ ጊሽ ታ ቦላ ጋኪዳ ዋዩዛን ኢንቴ ኡፋይስ ቃንዶንታ ማላ ታ ኢንቴና ሃዳራ ጋይስ።

**ኤፌሶስን አማኒዳ አሳስ ዎሴቲዳ ዎሳ**

14 ሄሳ ጊሽ ታኒ ያሳ ሲንሳን ጉልባታይስ። 15 ሳሎን ዲዛይኔ ቢታ ቦላ ዲዛ ኢዛሶ አሳይ ወራካ ኢዚ ሱንሲን ሱሜስ። 16 ኢንቴ ጋርሳ ባጋራ ሚናና ማላ አያና ባጋራ ኢዛ ቦንቾ ዱሬቴሳይ ኢንቴስ ኢሜታና ማላ ታ ዎሳይስ። 17 ሄሲካ ኪርስቶሲ ኢንቴ ዎዝናን አማኖን ዳና ማላኔ ቃሴካ ኢንቴ ኢዛን ዓጲዲ ሲቆን ሚናና ማላ። 18 ኪርስቶሳ ሲቆስ አሆቴሳይ፣ አዱሳቴሳይ፣ ዶቃቴሳይኔ ጨማቴሳይ አይ ጊናኮ ኢንቴ አማኒዳ አሳ ኡባራ ኢሲፌ ሻኪ ኤራና ማላ። 19 ኢንቴ ያሳ ኩሜሳራ ሻኪ ኤራዲ ኢዛን ኩሜስ ጊዳና ማላ አሳ ኡራፔ ቦላ ጊዲዳ ኪርስቶሳ ሲቆ ኢንቴ ኤራና ማላ ታ ዎሳይስ። 20 ሄሳ ጊሽ ኑ ጊዶን አሲዛ ባ ዎልቃ ጊና ኑ ዎሲዛይሳፌኔ ዎይኮ ኑ ቆፒዛይሳፌ ኡባሬ ቦላራ ኬሂ ዳርሲ አሳናስ ዳንዳዩዛ ያሳስ፣ 21 ዎሳ ኬሳን ቃሴካ ዮሱስ ኪርስቶሳ ባጋራ ዎዴ ኡባን ሜርናፔ ሜርና ጋካናስ ኢዛስ ቦንቾይ ጊዶ። አሚን።

4

**ኪርስቶሳ ባጋራ ቤቲዳ ኢሲፌቴስ**

1 ሄሳ ጊሽ ጎዳ ሱንሳን ቃሼቲዳ ታኒ ኢንቴ ዔይጌቲዳ ዔይሳስ ቤሲዛ ዱስ ዳና ማላ ኢንቴና ዎሳይስ። 2 ሙሌካ አሽኬታኔ ሹጎታ ጊዲቴ። ኢሶይ ኢሳራ ሲቆን ዲቴኔ ኢሶይ ኢሳ ዳንዳዩቴ። \* 3 ሳሮቴስ ኢሚዛ አያና ኢሲፌቴስ ናጋናስ ሚኒቴ። 4 ኢንቴ ዔይጌቲዳ ጋላስ ኢሲ ሂዶታኮ ዔይጌቲዳ ማላ ኢሲ አሳቴሳኔ ኢሲ አያናይ ዴስ። 5 ኢሲ ጎዳይ፣ ኢሲ አማኖይኔ ኢሲ ዒንቃታይ ዴስ። 6 ኡባሬ ቦላራ ጊዲዳይ፣ ኡባ ቦላ አሲዛይ፣ ኡባሶን ዲዛይ፣ ኡባስ አዋ ጊዲዳ ኢሲ ያሲ ዴስ። 7 ጊዲኮካ ኪርስቶሲ ኢማና ጊ ቃቺዳ ማላ ኑስ ኢሳስ ኢሳስ ዱማ ዱማ ኢሞቴሲ ኢሜቲዴስ። 8 ሄሳ ጊሽ “ኢዚ ፑዴ ኬዚዳ ዎዴ ዲዎ ዲዒዴስ፤ አሳስ ኪያቴሳ ኢሞታ ኢሚዴስ”

\* 4:2 ቆላ 3:12-13

ጌቲቲ ጌሻ ማፃፋን ሃፌቲደስ። \* 9 ሂስቲን “ኢዚ ፑዴ ኬዚደስ” ጉሲ ቃሴካ ዱጌ ቢታ ጋርስ ዎዲደስ ጉስ ጊዶንታ አጊኮ ሄሲ አይ ጉሴ? 10 ኢዚ ዱጌ ጋርሴ ዎዲዳይሲ ኩሜል አላሜ ሜዴቴል ኩማና ማላ ሳሎፔካ ቦላ ኬዚዳይ ኢዛ።

11 ኢሲ ኢሲ አሳቲ ሃዋሬታ፣ ባጋቲ ናቤታ፣ ሃራቲ ሚሺራቾ ቃላ ሳባኬ፣ ባጋይቲ ቃሴ ሄሚዳይታኔ ታማርሲዳይታ ጊዳና ማላ ኢዚ ኢዋታ ኢሚደስ። 12 ሄሲካ ኪርስቶሳ አሳቴል ጊዲዳ ዎሳ ኬሲያ ኬዪታና ማላ አማኒዳይታ አማኖ አሶስ ጊጊሳና። 13 ሄሲካ ሃናናይ ኑ ወሪካ ዎሳ ና አማኖኒኔ ኢዛ ኤሮን ቤቲዛ ኢሲፌቴላኮ ታኪዲ ኩሜላ አስ ጊዳናስ ኪርስቶሳን ኑኒ ኪርስቶሳሶ ኩሜሲኔ ፖሎ ጊዳና ማላ።

14 ሄሳ ጊሽ አባ ቦላ ዴንዲዛ ጎቴ ጫርኮይ ሄኔ ሃ ሾጩቺዛ ማላ ዱማ ዱማ ቲሚርቴ ጫርኮን አሳ ጌኔኒኔ ባሌሶን አኔ ኑኒ ሄኔ ሃ ጳንቄቲሼ ቁሪ ጉሳ ናይታ ማላ ሃኖኮ። 15 ሄሳሶ ሃኖ አጊዲ ቱማ ሲቆን ሃሳዩሼ ሁዔ ጊዲዳይሳኮ ሃኒዛዛን ኡባን አኔ ዲጮስ። ሄ ሁዔዚካ ኪርስቶሳ። 16 ኢዛ ጊዶን አሳቴሲ ወሪ ፃጳን አይኬቲዲ ኢሲ ኢሲ አሳቴሲ ባ አሶ አሲሼ ወሪካ ሲቆን ዲጩሲኔ ባናካ ሚንሴስ። \*

**ፖዎ ናይታ ማላ ዱስ**

17 አይዛቤታ ማላ ጮ ሜላ ቆፋን ሜላ ሲሜሬታናስ ኢንቴስ ቤሴና ጋዳ ታ ኢንቴና ዞራይስ። 18 ኢስታ ዎዝናይ ሙሚዳ ጊሺኔ ዩሺ ቆፖንታ ጊሽ ኢስታ ዎዝና አይፌይ ቆቂደስ። ኢስቲ ዎሳ ዴዎፔ ሻኬቲዳ። 19 ኢስታ ዎዝናይ ዶጪዳ ጊሽ ካሎይ ባይንዳ ባ ኮይዳ ማላ ባና ካልሶንታ አሞኒኔ ቱናቴላን ዳናስ ዎጋይ ባይንዳ ኢታ አሶስ ባና አሲ ኢሚዳ።

20 ኢንቴ ቃሴ ኪርስቶሳ ሄሳ ማላን ኤሪቤይኬታ። 21 ኤ ቱሙካ ኢንቴ ኢዛ ጊሽ ሲዩዴታኔ ዩሱሳን ዲዛ ቱማ ኢዛፔ ታማሪዴታ። 22 ኢንቴ ካሴ ዲዛ ዱሳይ ባሌሲዛ አሞን ቂታቲዳ ጊሽ ካሴ ጩጋ አሳቴል ኢንቴፌ ቃሪ ዩጋና ማላ ታማሪዴታ። \* 23 ቃሴካ ኢንቴ ቆፋይ አያናን ኡራዎ። 24 ቱሙ ጊሎቴላኒኔ ጌሻቴላን ዎሴ ሚሳታና ሜዴቲዳ አራሳ አሳቴል ማይዒቲ። \*

25 ኑ ወሪካ ኢሲ አሻ ጊዲዳ ጊሽ ዎርዶቴል ዲጊዲ ኑኒ ኑ ጋርሳን ኢሶይ ኢሳራ አኔ ቱማ ሃሳዮስ። \* 26 ሃንቄቲቲ ሺን ናጋራ አሶፍቴ፤ ኢንቴ ሃንቆን ዲሺን አዋ አርሼይ ወሎፎ። \* 27 ፃላዔስ ሶዎ ኢሞፍቴ። 28 ካሴ ካይሶቲዛዴይ ሃይሳፌ ጉዩ

\* 4:8 ማዛ 68:18      \* 4:16 ቆላ 2:19      \* 4:22 ቆላ 3:9      \* 4:24 ቆላ 3:10  
\* 4:25 ዛካ 8:16      \* 4:26 ማዛ 4:4

ካይሶቶፓ። ጊዶ አቲን ሜቶቲዲ ኢዛ ዎሲዛይታስ ኢሚዛ ሚሽ ኢዛ ኩሼን ዳና ማላ ሎዎ ሚሽ ባ ኩሼራ ኦሲ ዴማናስ ዳቡሮ።  
 29 ኮሺዛ ማላ ሃንኮ ሲዩዛይታ ጎረዛዚኔ ማዲዛ ቃላፔ አቲን ጎዎይ ባይንዳ ቃላይ ኢንቴ ዱናፔ ኬዞ። 30 ኢንቴ አታና ጋላሳስ አታሜቲዳ ዎሳ ጊሎ አያና ሚሺሶፒቴ። 31 ጫሞ ዮዎ ወርሲ ሃንቆዛ፣ ዩሎ፣ አሽ፣ ጫሼ፣ ቃሴካ ሃንኮ ሃራ ኢታቴሰ ወርሲ ኢንቴፌ ዲጊቴ። 32 ኢንቴና ዎሲ ኪርስቶሳ ባጋራ አቶ ጊዳ ማላ ኢንቴካ ኢንቴ ጋርሳን አቶ አቶ ጌቴቴ፤ ኢሶይ ኢሳራ ኪያታኔ ኢሶይ ኢሳስ ቃዴቲዛይታ ጊዲቴ። \*

5

1 ሄሳ ጊሽ ኢንቴ ዶሴቲዛ ናይታ ማላ ዎሴ ሚሳቲቴ።  
 2 ኪርስቶሲ ኑና ሲቂዳ ማላ ቃሴካ ኑ ጊሽ ባና ሳዊዛ ያርሾ አሰ ዎሳስ ኢሚዳ ማላ ኢንቴካ ሲቆን ሲሜራቲቴ። \*  
 3 ላይማይ ዎይኮ ቴናቴሲ ዎይኮ ኡዜቴሲ ሙሉካ ኢንቴ ጊዶን ቤቶይ አቲን ዜጊርሲካ ሲዩቶፎ። ሄሳ ማላይ ጌሻ ዎሳ አሳስ ቤሴና። 4 ኢንቴ ጋላታ ጋላቲዛይታ ጊዲቴ አቲን አሴ ዩላቺዛ ላፋ ሃሳያይ ጮ ኤያቴሳ ዮዎይ ኢንቴስ ቤሶንታ ጊሽ ሄሳ ማላይ ኢንቴ ጋርሳን ዶፖ። 5 ቃሴካ ኢንቴ ላይማቲዛይታስ ዎይኮ ቴናታስ ዎይኮ ኡዜቴዛይታሲኔ ኤቃስ ጎይኒዛይታስ ኪርስቶሳ ካዎቴሳኒኔ ዎሳ ካዎቴሳን ኢስታስ ላታሶይ ባይንዳይሳ ኢንቴ ኤሪቴ።  
 6 ኢንቴና አኒካ ዎርዶ ሃሳዮን ባሌሶፎ። ጋሶይካ ዎሳ ሃንቆይ ኢዛስ አዛዜቶንታ ናይታ ቦላ ያናይ ሃይታንታ ማላና። 7 ሄሳ ጊሽ ሄሳንታ ማላራ ዙፔቶፒቴ። 8 ካሴ ኢንቴ ዱማ ሺን ጎዳን ሃረ ኢንቴ ፖዎ። ኢንቴ ፖዎ ናይታ ማላ ዲቴ። 9 ፖዎስ አይፌይ ሎዔቴሳን፣ ጊሎቴሳኒኔ ቴማቴሳን ኡባን ዴስ።  
 10 ሄሳሶካ ጎዳ ኡፋይሲዛ ሚሽ ኮዩቴ። 11 አይፌይ ባይንዳ ዱማ አሶራ ኢንቴስ አይኮ ጋንቴሲ ዶፖ። ሄሳፌ ኢታ አሶ ቆንጩ ኪሲቴ። 12 ዱማን ዲዛ አሳቲ ጌማን አሲዛ ሚሻ ጊሽ ሃሳያይካ ዩላቺስ። 13 ፖዎይ ፖረዳዚ ወሪ ቆንጩን ቤቴስ። 14 ጋሶይካ ወርሲ ቤሲዛይ ፖዎ። ሄሳ ጊሽ “ኔና፣ ዲስኪዛይሶ ቤጋ! ሃይቆፔ ዴንዳ፣ ኪርስቶሲ ኔስ ፖረሳና” ጌቴቲዴስ።  
 15 ሄሳ ጊሽ ኤራቴሲ ባይንዳይታ ማላ ጊዶንታ ኢንቴ ዋኒዲ ኤራታ ማላ ዳናኮኔ ናጌቴቴ። 16 ሃይሲ ዎዴዚ ኢታ ጊዲዳ ጊሽ ሄሳ ሎዔሲ ኤሪቴ። \* 17 ሄሳ ጊሽ ኤያታ ጊዶፒቴ፤ ጎዳ ሼኔይ አዛኮኔ ዩሺ ቆፒቴ።

\* 4:32 ቆላ 3:13 \* 5:2 ኬሳ 29:18፣ ማዛ 40:6 \* 5:16 ቆላ 4:5

18 አያናይ ኩሚዳይታ ጊዲቴ አቲን ማሶሲዛ ኡሻን ማሶቶፍቴ። ሄሲ ሜላ ሚሻ ላሌላ። 19 አያና ዮሳን ጋላታራ ጋሊ ዮጊሼ ኢንቴ ጊዶን ኢሶይ ኢሳራ ሃሳዮቴቴ። ኢንቴ ሳባኒኔ ዮሳን ኩሜሳ ዎዝናቴ ጎዳ ጋላቴቴ። 20 ሄሳን ዎሳ አዋ፣ ጎዳ ዮሱስ ኪርስቶሳ ሱንሳ ኡባ ሚሻስ ኡባ ዎዴ ጋላቴቴ።

**ማሾኔ አዚና**

21 ኢንቴ ኪርስቶሳ ቦንሾስ ጊዲ ያሻራ ኢሶይ ኢሳስ አዛዜቴቴ።  
22 ማሾቶ ኢንቴ ጎዳስ ሃሬቲዛ ማላ ኢንቴ አዚናታስ ሃሬቴቴ። \*  
23 ኪርስቶሲ ባ አሾ ጊዲዳ ዎሳ ኬሳይስ ሁዔ ጊዲዳ ማላ አዚናይካ ባ ማሾይሲ ሁዔ። 24 ሄሳ ጊሽ ዎሳ ኬሊያ ኪርስቶሳስ አዛዜቴዛ ማላ ማሾቴካ ባ አዚናታስ አይ ሃኖንካ አዛዜታናስ ቤሴስ።  
25 አዚናቶ! ኪርስቶሲ ዎሳ ኬሳዮ ሲቂዳ ማላኔ ባና ኢዚ ጊሽ አሲ ኢሚዳ ማላ ኢንቴካ ኢንቴ ማሾታ ሲቂቴ። \* 26 ባ ቃላ ባጋራ ሃሳን ሜጪ ጊሽዲ ኤራይስ ዱማሲዳ ማላ። 27 ሄሳሳካ ቂታይ ዎይኮ አይፊሶ ጊርጳቴሲ ዎይኮ ኢሲ ኢታይ ኢዚ ቦላ ቤቶንታ ጊሼኔ ባላይ ኢዚ ቦላ ባይንዳር ቦንሾ ዎሳ ኬሴ ሂስቲዲ ኤራይስ ሺሻናሳ። 28 አዚናቴካ ሄሳሳ ባ ማሾታ ባ አሾ ማላ ሲቃናስ ቤሴስ። ባ ማሾ ሲቂዛዴይ ባና ሲቂስ። 29 ባርካ ባና ኢዲዛዴይ አኒካ ባዋ። ባ አሾስ ሜሲኔ ባና ናጌስ። ኪርስቶሲካ ዎሳ ኬሳስ ሂኒሶ አሲዴስ። 30 ኑኒ ኪርስቶሳ አሳቴላ። 31 ሄሳ ጊሽ “አሲ አዮኔ አዋ አጊዲ ባ ማሾይራ ኢሲኖ ጊዴስ፤ ናምዳይካ ኢሲ አሾ ጊዴቴስ” ጌቴቲ ጊሻ ማፃፋን ፃፊቴዴስ። \* 32 ሃይሲ ዳር ፀራ ዮጎ፣ ታካ ሃይሳ ኪርስቶሳ ጊሼኔ ዎሳ ኬሳ ጊሽ ዮታይስ። 33 ጊዲኮካ ኢንቴፊ ኢሲ ኢሳዴይ ባ ማሾ ባና ሲቂዛ ማላ ሲቆ፤ ማሾካ ባ አዚና ቦንሾ።

6

**ዮሊዳይታኔ ናይታ**

1 ናይቶ! ኢንቴ ኢንቴና ዮሊዳይታስ ጎዳን አዛዜቴቴ። ሄሲ ኢንቴስ ቤሴስ። \* 2 “ኔ አዋኔ ኔ አዮዮ ቦንቻ” ጊዛ አዛዞ ጊዶን ዲዛ ሂዶታይ ኮይር አዛዞ። 3 ኔ ሄሳሳ አሲኮ ኔስ ሎዓናኔ ኔስ ላይሳይ ቢታ ቦላ አዱቃና። 4 ዮሊዳይቶ! ኢንቴካ ኢንቴ ናይታ ሃንቁሶፍቴ፤ ጊዶ አቲን ኢንቴ ናይታ ጎዳ ዞሬኒኔ ሴራን ዲቺቴ። \*

\* 5:22 ቆላ 3:18፤ 1ጴፅ 3:1 \* 5:25 ቆላ 3:19፤ 1ጴፅ 3:7 \* 5:31 ሜዴ 2:24 \* 6:1 ቆላ 3:20 \* 6:4 ቆላ 3:21



**አሲሲዛይታኔ አሲዛይታ**

5 አሳንቻቶ ኢንቴ ኪርስቶስ አዛዜቲዛ ማላ ቢታ ቦላ ኢንቴና አሲሲዛይታስ ያሻቴሳኒኔ ቦንቾን ሱሬ ዎዝናፔ አዛዜቲቱ። 6 ጮ አሳ አይፌን ቤታና ማላኔ አሲሲዛይታፔ ዱና አንጆ ኤካናስ ጊዶንታ ኢንቴ ኪርስቶሳ አይሌታ ማላ ያሳ ሽኔ ኩሜሳ ዎዝናፔ ፖላና ማላ ዎዝናፔ አዛዜቲቱ። 7 አሳስ አሲዛ ማላ ጊዶንታ ጎዳስ አሲዛ ማላ ኢንቴ ኩሜስ ዎዝናፔ አሲቴ። 8 ጋሶይካ አይሌ ጊዱን ዎይኮ ጎዳ ጊዱን ባ አሲዛ ሎዎ አሶስ ኡባስ ዎይቶ ኤካናይሳ ኢንቴ ኤሬታ።

9 ኢንቴኖ ጎዳቶ! ኢንቴካ ኢንቴ አሲሲዛይታስ ሄሳሶ አሲቴ። ኢስታሲኔ ኢንቴስ ጎዳ ጊዱዳይ ቦላ ሳሎን ዲዛይሳ፤ ኢዚካ አስ አይፌሶ ዩሊ ማዶንታይሳካ ኢንቴካ ኤሪዛ ጊሽ አሳንቻታ ባቢሶ አጊዱ ሎዎ አሲቴ። \*

**ያሳፌ ቤቲዛ አሳ ሚሽ**

10 ሃራ ባጋራ ሚኖ ጎዳኒኔ ኢዛ ጊታ ዎልቃን ሚኒቴ። 11 ዳቡሎሳ ጌኔ አሶ ኢንቴ ኤቄታናስ ዳንዳያና ማላ ያሳ አላ ማይዎታ ማይቴ። 12 ጋሶይካ ኑ አሌታናይ አሾራኔ ሱሳራ ጊዶንታ ሃይሳ ዱማ አላሜዛ ሃሪዛ ጎዳታራኔ ዎልቃማታራ ቃሲካ ሳሎ ቦላ ዲዛ ቴና አያና አሳንቻታራ አሌቶስ። 13 ኢታ ጋላሳይ ጋኪሺን ኢንቴ ሞርኬ ዎልቃራ ኤቄታናስ ዳንዳያና ማላ ያሳ አላ ማይዎታ ኩሜስ ማይዲቴ። ኢንቴ ኡባካ ፖሊዳፔ ጉዬ ሚኒ ኤቃናስ ዳንዳዬታ።

14 ሄሳ ጊሽ ኢንቴ ዩሳን ቴማ ዚናሬ ማላ ዳንጨቲዲ ዩሎቴሳ ፀሩሬታ ማላ ቲራን ማይዲዲ። \*\* 15 ሳሮቴሳ ሚሺራቾ ቃላ ቶሆን ጫማ ማላ አሲዲ ጊጌቲ ኤቄቴ። \* 16 ሄይታንታፌካ ቦላራ ታማ ማላ ፖፖልዑ ጊዛ ኢታ አያና ዎንዳፌታ ኢንቴ ዉርሲ ቶይሳና ዳንዳያና ማላ አማኖ ጎንዳሌ ማላ ዴንሲቴ። 17 አቶቴስ ቢራታ ቆቤ ማላ ሁዔን ዎሲቴ። አያና ጊሳ ማሻ አይኪቴ፤ ሄሲካ ያሳ ቃላ። \*

18 ዎሳን አይ ሃኖንካ አያናን ዎሲቴ። ሄሳ ቆፐዲ ቤጊቴ፤ አማኒዛይታ ኡባ ጊሽ ቃንዎንታ ዎአሲቴ። 19 ታኒ ሚሺራቾ ቃላ ፀራ አሳስ ቆንጨሳናስ ዱና ዶዩዛ ኡባ ዎዴ ያሺ ባይንዳ ታ ያላቴሳን ዮታና ቃላይ ታስ ኢሜታና ማላ ታስ ዎሲቴ። 20 ታኒ ሚሺራቾ ቃላ ጊሽ ሳንሳላታን ቃሺታዳ ኪቴቲዳዴ ጊዱዳይ

\* 6:9 ቆላ 4:1፤ ዛሬ 10:17፤ ቆላ 3:25 \* 6:14 ፀሩሬ ጉሲ ቤኒ ዎዴ አላ አሳቲ ቲራን ማይዲዛ አላ ማይዎ። \* 6:14 ኢሳ 11:5፤ 59:17 \* 6:15 ኢሳ 52:7 \* 6:17 ኢሳ 59:17

ሄሳሳ። ሄሳ ጊሽ ታ ዮታናስ ቤሲዛይሳ ባቦንታ ዮታና ማላ ታስ ዎሲቴ።

**ዉርሴሳ ሳሮካ**

<sup>21</sup> ታ አይ ማላ ዲዛኮኔ አይ አሲዛኮ አ.ንቴ ኤራና ማላ ዶሴቲዳ ታ ኢሻይ ኅዳስ አማኔቲዳ አሳንቻይ ቲቂቆሲ አ.ንቴስ ሃኒዳይሳ ዉርሴካ አ.ንቴስ ዮታና። \* <sup>22</sup> አ.ንቴ ኑ ሃኖቴስ ኤራና ማላኔ አ.ንቴ ዎዝና ኢዚ ሚንሴሳና ማላ ታ ኢዛ አ.ንቴኮ ዩዳዲስ። \*

<sup>23</sup> አዋ ያሳፌ፣ ኅዳ ዩሱስ ኪርስቶሳፔ ሳሮቴሲኔ ሲቆይ አማኖራ አ.ንቴስ ታ ኢሻታስ ጊዶ። <sup>24</sup> ኅዳ ዩሱስ ኪርስቶሳ ፓጩይ ባይንዳ ሲቂዛ ኡባስ ሳሮቴሲ ጊዶ። አሚን።

---

\* 6:21 ሃዋ 20:4፤ 2ጊዎ 4:12

\* 6:22 ቆላ 4:7-8

## አራሳ ጫቆ ማገፋ ጋሞላ

### New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

